

Vun driveriver

erscheint auf www.lenauheim.de

monatliche
Erscheinung

Mai 2017

von Helen Alba

De orschäwisch Zecker

De Vetter Matz is am liebschte mit abgeschabte Bludschhose rumgelloff. Sie ware kummod un han vill Säck ghat, die mit allem Meegliche vollgestoppt ware. Die Bäsl Lentschi hat sich derbei die Seel ausm Leib geärchert. Doch ihre Rederei war for die Katz. „Matz, im Schank hänge e Dutzend Stoffhose. In alli Farwe, for im Summer oder Winter. Muscht dich ausstalliere losse? Es kenne dich un ach mich sovill Leit. Un alli were se mich verschenke, dass ich dich nit anzieh for uner die Leit gehn“. Umesunscht. Die zwaa lescheere Hose aus Bludsch ware em am liebschte.

Im hinnre Sack hat er zu allem Iwel noch e orschäwische Zecker aus dunklbloem Fasch ghat. Der war immer so schenn kleen zammgeleet, dass mer menne hat kenne, er werd e jede Owet gebiegelt. Wenschtens eemol in der Wuch is de Zecker „verlor gang“. Enweder hat de Vetter Matz ne verleet ghat un nimi gewisst wuhin. Dann hat er solang dernoh gsucht, bis er ne im Haus oder in der Garasch gfunnt hat.

Doch an em scheene Tach is er mit dem Zecker im hinnerschte Hosesack ins Gschäft. Dorte hat er nit gfunnt, was er kaafe hat wille. Un wie er wieder derhem war un schun zu Mittach gess ghat hat, froot er ufmol wu de Zecker is. „Aso Matz, ich kann doch nit uf Schritt un Tritt hinner der her sin. Der Zecker, ich wer ne mit der Scheer verratzle un wegwerfe. Ich han doch anständichi Tragetaschne. Muscht dich mit allem in Schand stelle“? „Lentschi, du iwertreibsch. De neimodisches Firlefanzt kann ich nit scheen zammleije un in de Hosesack steche. Loss mer endlich mei Ruh. Ich sin wie ich sin un basta“!

Ufmol springt de Vetter Matz uf, schluppt in die Schuh un drauss war er. Die Bäsl Lentschi hat em noch nohrufe wille, wu er jertz wieder hinrennt – doch er war weg. Noh fünf Minute is er awer wieder zu Tier rin kumm un schwengt sei Zecker stolz hin un her. „Stell der mol vor Lentschi! Ich muss de Zecker beim Ufsperre vun der Eingangstier zu unsrem Block falle gelosst han. Un anständig sin unser Mitbewohner. Jemand hat ne zammgerafft un an unser Postkäschtel ghong!“ Die Bäsl Lentschi hat sich noch meh eärchert: „Natierlich! Alli Leit wisse, wer mit so em flattriche Zecker dorch die Gegend rennt! Ich muss mich jo in die Erd nin schäme!“ Des steert de Vetter Matz awer nit. Hauptsach de Zecker war do!

Die Trummle ohne Stecke

Es war mol wieder soweit, dass die Kinner aus Deitschland uf Bsuch kumm sin. Mir han uns stark gfreit. Wie se uns telefoniert han, dass se geeger nein Uhr morjets wegfahre, han ich schun ausrechne kenne, dass se am friehe Owet do sin misste. Doch es war korz vor Mitternacht bis se ankumm sin. Weil se bei uns nor stehn geblieb sin for Sache auslade, han mer uf der Gass gstann un gewart bis se kumm sin. Allerhand is abgelad wore, dann sin se weitegfahr, weil se jo noch ihre eigeni Wohnung do in Temeschwar han.

Wie mer alles in unser Wohnung getraa han, war uner dem Gebindels ach e große Zatschko, voll awer leicht. Ich han nor bissl nin geguckst un gsiehn, dass es so an die fünf Trummle sin, also Spillsach. Ich han gement, die sin vun unsrem Kleene iwrich geblieb un sie wille se do an anri Kinner vun ihre Kumrade verschenke.

Am anre Tach, wie mer alli ausgeruht ware, sin mer in de Kinner ihre Wohnung. Do han ich mei Schwiegertochter gfroot, was ich mit de ville Trummle mache soll. Des hat mich ganz verständnislos anschaut un gement, sie hätte doch gar ke Trummle mitgebrung. Mir han uns mit dem Kind verspillt. Un wie mer wieder derhem ware, war mei erschetes, de Zatschko ufzumache un schau, was dann dorte eigentlich drin is.

Noh han mer alli mol gut lache misse. Drin ware fünf grossi Blechschachtel, also „Trummle ohne Stecke“. In deni Schachtel war mol Keks drin. Un sie han nit ghat, wuhin des Zeich entsorche. Drum han se de Zatschko ganz einfach in de Kofferraum, weil se gedenkt han, die Blechschachtel, do drin kann de Vati sei Nägl un Schrauwe un sunschliches Firlefanzt ufheue!